

Planina Trebević, karakteristična po duboko usečenim klisurastim dolinama reka Paljanske i Mokranjske Miljacke, 45. je zaštićeno područje u BiH.

Park prirode „Trebević“ na teritoriji Grada Istočnog Sarajeva proglašen je zaštićenim područjem odlukom Vlade Republike Srpske (RS). Ovo područje obuhvata preko pet hiljada hektara - veći deo planine Trebević do entitetske granice te doline reka Paljanske i Mokranjske Miljacke.

Trebević je 33. zaštićeno područje u RS-u, odnosno 45. zaštićeno područje u Bosni i Hercegovini (BiH). Deo ove planine koji se prostire na teritoriji Federacije BiH zaštićen je od 2014. godine.

Zaštićeno područje je značajno pokriveno šumom, a karakteristično je po duboko usečenim klisurastim dolinama koje čine prirodnu granicu između Trebevića i Romanije. Bogato je pećinama, jamama, vrtaćama i ponorima, a odlikuje ga velika raznovrsnost biljnih i životinjskih vrsta. Također, na planini se nalaze i atraktivni pejzaži Brus i Dovlići koji su pogodni za odmor i rekreaciju.

Studiju zaštite izradio je Republički zavod za zaštitu kulturno-istorijskog i prirodnog nasleđa nakon inicijative za zaštitu koju je podnio Grad Istočno Sarajevo. Odluku o proglašenju pripremlilo je Ministarstvo za prostorno uređenje, građevinarstvo i ekologiju RS-a i svrstano je u kategoriju V - zaštićeni pejzaž kao park prirode.

Centar za istraživačko novinarstvo (CIN) je 2020. godine izradio bazu podataka o zaštićenim područjima u BiH. U bazi su prikazana sva zaštićena područja u zemlji, njihovi osnovni podaci i fotografije.

CIN je 2020. godine pisao kako su zaštićena područja, uprkos stavljanju pod zaštitu, ugrožena nekontrolisanom eksploatacijom, privatnim interesima, ali i zanemarivanjem nadležnih ustanova, prenosi CIN.